



Jumat, 01 Maret 2024
Ogen: Nahum 1:1-10



Pernembeh Ate Tuhan



Nahum ertina Jahwe menghibur. Asalna arah Elkos. Ia si nubuatkensa kerna keruntuhen Niniwe ras pengukumen Tuhan nandangi bangsa e. Arah bena kata kitab Nahum enda maka teridah, Dibatanta e labo terjeng Dibata si perkeleng tapi IA pe Dibata si mecimberu ras singukum. Enda mpetangkas mulihi kerna sifat Dibata si enggo tersurat i bas 10 Pedah Dibata si ialoken Musa nai. Janah kata iukumNa lit 3 x i je si nuate itekanken Nahum kerna ise Dibata man kalak Niniwe.

Kata iukum megati kal itafsirken alu kalak balas dendam tapi kata enda si tuhuna encidahken kerna keadilan Dibata. Ikataken i bas ayat 3 maka Dibata e labo meter merawa aminna pe Ia erkuasa tapi kerina kalak si ersalah iukumNa. Ertina, Dibata e ngukum kalak si ersalah labo alu emosi saja tapi ilakokenNa alu saber ras adil. Ayat 3b-10 nuriken uga luar biasana adi Tuhan ernembekh ate ras ngukum kalak si ngelakoken kejahatan. Kerina tinepaNa sontar erkiteken rawaNa. Lawit kerah,deleng-deleng nggirgir, doni mundu-undu. Situhuna ise pe labo ngasup ertahan adi Dibata nggo ernembekh ate. Tapi Nahum ngidahsa maka rawa ras pernembekh ate Tuhan e me kiniulinNa. Sabap pernembekh ate Tuhan e isekhen man musuh-musuh bangsaNa. Pernembekh ate Tuhan e jadi sada perlindungan nandangi bangsaNa. Arah nubuatan Nahum enda, maka banci si dat sada pesan si jelas maka Tuhan labo sinik nandangi kejahatan i bas doni enda. Adi reh pe ukumen Tuhan e, erkiteken nggo mekengsa pusuh manusia si la megiken persinget Tuhan. Adi lang, Tuhan e tuhu-tuhu persaber dengen itimaiNa kalak si nggit jera i bas kejahatenna nari ras mulih guna nggeluh ras ndalanken perintah Tuhan. Sieteh nge 100 tahun ope Nahum, nggo reh Nabi Juna mpersingeti kalak Niniwe gelah jera janah kerina bangsa e jera paksa si e. Tapi megati denga kita manusia nukah ndabuh ras terpengaruh ku bas kejahatan ras dosa piahna kita pe nilah i bas dalan Dibata. E maka tetaplak nggeluh bagi singena ateNa gelah tetap sialoken kemalmen ate i bas Tuhan nari.